

Na osnovu člana 18. tačka b) Ustava Kantona Sarajevo („Službene novine Kantona Sarajevo“, br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana _____. godine, donijela je

NACRT

Z A K O N

O PREKRŠAJIMA PROTIV JAVNOG REDA I MIRA NA PODRUČJU KANTONA SARAJEVO

DIO PRVI – OPĆE ODREDBE

Član 1. **(Predmet)**

Ovim zakonom uređuje se javni red i mir na području Kantona Sarajevo, utvrđuju prekršaji protiv javnog reda i mira i prekršajne sankcije koje se izriču počiniocima prekršaja, postupak za priređivanje bakljade, vatrometa i sličnih priredbi, postupak za prikupljanje dobrovoljnih priloga od građana, državnih organa, preduzeća i drugih pravnih lica, kao i druga pitanja od značaja za oblast javnog reda i mira.

Član 2. **(Javni red i mir)**

Javni red i mir, u smislu odredbi ovog zakona, je usklađeno stanje međusobnih odnosa građana, nastalo njihovim ponašanjem na javnom mjestu i djelovanjem organa i organizacija koje vrše javna ovlaštenja radi obezbjeđenja jednakih uslova za ostvarivanje ustavima i međunarodnim konvencijama zajamčenih ljudskih prava i osnovnih sloboda.

Član 3. **(Definicija prekršaja protiv javnog reda i mira)**

- (1) Prekršaji protiv javnog reda i mira su radnje i postupci kojima se na nedozvoljen način:
- a) remeti mir, rad i normalan način života građana,
 - b) stvara neraspoloženje, uznemirenost ili panika kod građana,
 - c) ometa kretanje građana na ulicama i drugim javnim mjestima,
 - d) ugrožava sigurnost ljudi i imovine,
 - e) ometa ostvarivanje prava i dužnosti građana,
 - f) vrijeđa društveni moral,
 - g) vrijeđaju ili omalovažavaju državna obilježja i simboli različitih nivoa vlasti,
 - h) ugrožavaju zakonito naložene mjere od strane državnog ili drugog nadležnog organa koje idu u pravcu sigurnosti i zaštite građana,
 - i) ne poštuje ili sprečava ili ometa ili omalovažava izvršenje zakonito naloženih mjera državnih ili drugih nadležnih organa i službenih lica,

- j) lažno predstavlja ili prikriva identitet prilikom činjenja prekršaja ili lažno prijavljuje narušavanje javnog reda i mira,
 - k) vrijeđaju vjerska, nacionalna, rasna i rodna osjećanja građana,
 - l) čine prekršaji protiv interesa maloljetnika i drugih kategorija lica i
 - m) na drugi način narušava javni red i mir građana propisan ovim zakonom ili odlukama ovlaštenih organa iz člana 53. ovog zakona.
- (2) Prekršaji protiv javnog reda i mira iz stava (1) ovog člana, mogu biti učinjeni i putem sredstava javnog informisanja, društvenih mreža ili drugih sličnih sredstava elektronske komunikacije.

Član 4. (Prekršajne sankcije)

Za prekršaje protiv javnog reda i mira propisane ovim zakonom mogu se izreći sljedeće prekršajne sankcije:

- a) novčana kazna i
- b) zaštitna mjera.

Član 5. (Javno mjesto)

- (1) Pod javnim mjestom, u smislu ovog zakona, smatra se mjesto na koje je slobodan pristup neodređenom broju lica, bez ikakvih uslova (ulice, trgovi, javni putevi, parkovi, izletišta, čekaonice, ugostiteljske, trgovinske i zanatske radnje i sl.) ili pod određenim uslovima (sportski stadioni i igrališta, bioskopske, pozorišne i koncertne sale, izložbene prostorije i sl.), kao i druga mjesta koja u određenom vremenskom periodu služe za ovakve svrhe (zemljišta, prostori ili prostorije u kojima se održavaju javni skupovi, takmičenja i sl.).
- (1) Smatraće se da je prekršaj iz ovog zakona izvršen na javnom mjestu i kad je radnja izvršena na mjestu koje se u smislu stava (1) ovog člana ne smatra javnim mjestom, ako je to mjesto dostupno vidiku ili sluhu sa javnog mjesta (balkoni, terase, hodnici, dvorišta i sl.) ili ako je posljedica nastupila na javnom mjestu ili ako je učinjen putem sredstava javnog informisanja, društvenih mreža ili drugih sličnih sredstava elektronske komunikacije.

Član 6. (Postupak u prekršajnim i krivičnim predmetima kada postoji mogućnost povrede načela “ne bis in idem”)

U situacijama kada postoji mogućnost povrede načela “ne bis in idem”, odnosno kada jedan događaj sadrži elemente prekršaja i/ili krivičnog djela, policijski službenik nadležne organizacione jedinice Uprave policije Ministarstva unutrašnjih poslova Kantona Sarajevo (u daljnjem tekstu: Uprava policije) postupa u skladu s odredbama Uputstva za postupanje u krivičnim i prekršajnim predmetima kada postoji mogućnost povrede načela ne bis in idem, broj 01-419/16 od 10.10.2016. godine.

Član 7.
(Značenje izraza)

Pojedini izrazi upotrijebljeni u ovom zakonu imaju sljedeće značenje:

- a) ovlaštenu organ je nadležni policijski organ u Kantonu Sarajevo, odnosno Uprava policije,
- b) policijski službenik je osoba zaposlena u Upravi policije čija je definicija propisana odredbama Zakona o policijskim službenicima Kantona Sarajevo („Službene novine Kantona Sarajevo“, br. 38/18, 26/19 i 39/20),
- c) lice kome je povjereno vođenje radnje je lice koje je, u trenutku vršenja prekršaja, zatečeno u ugostiteljskom ili drugom objektu da pruža usluge u skladu sa namjenom objekta,
- d) grupa je najmanje tri lica koja zajednički počine prekršaj,
- e) mlađi maloljetnik je maloljetnik koji je, u vrijeme izvršenja prekršaja ili zaticanja od strane policijskog službenika na javnom mjestu, navršio 14 godina, a nije navršio 16 godina života,
- f) stariji maloljetnik je maloljetnik koji je, u vrijeme izvršenja prekršaja ili zaticanja od strane policijskog službenika na javnom mjestu, navršio 16 godina života, a nije navršio 18 godina života,
- g) svađa je žučno kazivanje riječi između dva ili više lica na način i sa intenzitetom da to uznemirava građane i narušava red i sigurnost građana,
- h) vika (galama, vriska i sl.) je verbalna radnja izvršena neuobičajenim puštanjem glasova takvog intenziteta da se upravo time uznemiravaju građani ili narušava red i mir i sigurnost građana,
- i) nepristojno ili drsko ponašanje je verbalna ili realna radnja, odnosno izražavanje riječima ili ispoljavanje fizičkog ponašanja na upadljiv i neprimjeren način ili gestikulacija, grimasa ili drugi pokret kojima se izražava uvreda ili provokacija na javnom mjestu, koje prema općem shvatanju sredine predstavlja narušavanje najelementarnijih pravila ponašanja, društvenog morala i društveno potvrđenih odnosa među ljudima i u društvu, u takvoj mjeri, da za posljedicu imaju stanje kojim se izaziva uznemirenje ili negodovanje ili ugrožava spokojstvo građana,
- j) prijetnja je psihička prinuda koja kao takva djeluje na lice tako da ono osjeća ugroženost za svoj život ili tijelo, tj. za ličnu sigurnost (u pogledu tjelesnog integriteta) ili imovinu, zavisno od izraženog smjera i intenziteta prijetnje ili da osjeća ugroženost za život ili tijelo ili imovinu njemu bliske osobe. U suštini, prijetnjom kao radnjom izvršenja stavlja se u izgled drugom kakvo zlo (napad na njegov život ili tijelo ili imovinu, odnosno njemu bliske osobe) koje kao takvo ugrožava ličnu sigurnost ili izaziva osjećanje ugroženosti, jer je podobno da izazove ugrožavanje koje lice osjeća. Prijetnja postoji ako je ozbiljna, odnosno ako je lice kojem se prijeti shvati kao ozbiljnu, stvarnu i ostvarljivu,
- k) skitnja je pojava u kojoj lice, po pravilu bez sredstava za život, luta od mjesta do mjesta ili tako postupa u jednom mjestu i na taj način provodi život u besposličanju,
- l) prostitucija je individualni čin ili ustaljena praksa žene ili muškarca koji dopušta bilo kojoj osobi istog ili suprotnog spola, bez posebnih uslova ili uz postavljanje određenih uslova (mjesto, vrijeme, način i dr.), da za određeni dogovoreni iznos imaju spolni odnos,

- m) prosjačenje je traženje milostinje od drugog u novcu ili kakvoj drugoj koristi,
- n) hazardna igra je igra u novcu ili kojoj drugoj vrijednosti, igrana, priređena ili organizovana od strane neovlaštenih lica ili grupe lica, tako da igra gubi društveno-zabavni karakter. To je svaka igra u novac ili druge stvari od vrijednosti sa isključivim ciljem da se postigne novčana ili imovinska korist,
- o) buka je svaki neželjen i štetan zvuk jakog intenziteta, uzimajući u obzir vrijeme i mjesto gdje nastaje u sredini u kojoj ljudi borave i rade,
- p) izvor buke je svaki objekat sa sredstvima za rad i transport, uređajima, instalacijama, te bučne aktivnosti ljudi (izvođenje ili reprodukcija muzičkih i drugih sadržaja, korišćenje muzičkih instrumenata, radio i televizijskih prijemnika i drugih zvučnih uređaja, kao i rad motornog vozila, prijevoz, utovar, istovar, upotreba sirene, rukovanje predmetima ili na drugi način) i životinja (glasanje domaćih i divljih životinja), kao i drugi objekti i radnje od kojih se širi zvuk jakog intenziteta,
- r) sredinom u kojoj ljudi borave i rade smatra se svaki otvoreni i zatvoreni prostor u naseljima i izvan naselja u kojima se ljudi zadržavaju radi boravka, rada, edukacije, odmora i rekreacije.
- s) fizički napad na drugog predstavlja takvu nezakonitu radnju koja se sastoji u fizičkom napadu i kontaktu ili inicijativi napada koja se ogleda u pokretu i udaru kojim se drugo lice prisiljava na odbranu, nameće mu se borba ili traži njeno sprječavanje u takvoj situaciji. Napadač radnju može izvršiti sa ili bez pomoćnih sredstava (predmeta),
- t) učestvovanje u tuči jeste bilo koja fizička radnja kojom lice aktivno djeluje u tuči na bilo koji način. U tuči moraju učestvovati najmanje dva lica, a svaki od učesnika u tuči je izvršilac prekršaja,
- u) zlostavljanje se čini riječima i djelom i pritom se od strane izvršioca lice stavlja u podređen položaj i stanje u mjeri u kojoj se nipošta njegovo ljudsko dostojanstvo,
- v) izazivanje tuče je verbalno ili realno ponašanje lica prema drugima koje dovodi do takvog stanja koje za posljedicu ima negodovanje građana ili u ugrožavanje njihovog mira,
- z) nargila je fabrički napravljena naprava, kao i svaka druga improvizovana naprava, koja je namijenjena radi konzumiranja aromatiziranog duhana ili drugih supstanci pušenjem, na način da se dim sagorjelog duhana ili drugih supstanci hladi u vodi koja se nalazi u toj napravi,
- aa) opojna droga je svaka supstanca prirodnog ili vještačkog porijekla koja je uvrštena u listu opojnih droga u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini,
- bb) psihotropna supstanca je svaka supstanca prirodnog ili vještačkog porijekla koja je uvrštena u listu psihotropnih supstanci u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini i
- cc) opasna ili potencijalno opasna životinja je ona vrsta životinja od koje postoji ili ne postoji rizik da prema svojim prirodnim/urođenim sklonostima ispoljava sklonost za napad na čovjeka kojim mu može nanijeti tjelesne povrede ili ga usmrtiti.

Član 8.
(Ravnopravnost spolova)

Gramatička terminologija korištenja muškog ili ženskog spola u ovom zakonu podrazumijeva uključivanje oba spola.

DIO DRUGI – PREKRŠAJI PROTIV JAVNOG REDA I MIRA I PREKRŠAJNE SANKCIJE

POGLAVLJE I – OSNOVNI PREKRŠAJI PROTIV JAVNOG REDA I MIRA

Član 9.
(Svađa, vika, nepristojno ili drsko ponašanje)

- (1) Ko na javnom mjestu narušava javni red i mir svađom, vikom, nepristojnim ili drskim ponašanjem, kazniće se novčanom kaznom od 100 do 300 KM.
- (2) Ko se na javnom mjestu nepristojno ili drsko ponaša na način da vrši fiziološku potrebu ili izloži intimne dijelove tijela pogledu drugih, kazniće se novčanom kaznom od 200 do 600 KM.

Član 10.
(Naročito drsko ponašanje)

- (1) Ko na javnom mjestu naročito drskim ponašanjem, odnosno grubim vrijeđanjem drugog lica ili drugim bezobzirnim ponašanjem ugrožava sigurnost ljudi ili izaziva osjećanje fizičke ugroženosti ili uznemirenosti ili negodovanje lica, kazniće se novčanom kaznom od 400 do 1.200 KM.
- (2) Vozač motornog vozila koji nepropisno zaustavi ili parkira motorno vozilo na javnom mjestu ispoljavajući time naročito drsko i bezobzirno ponašanje, jer tom svojom radnjom onemogućava ili otežava normalno odvijanje saobraćaja, kazniće se novčanom kaznom od 400 do 1.200 KM.

Član 11.
(Ozbiljna prijetnja)

- (1) Ko ugrožava sigurnost ili izaziva osjećanje ugroženosti drugog lica prijetnjom da će napasti na njegov život, tijelo ili imovinu ili život, tijelo ili imovinu njemu bliskog lica, kazniće se novčanom kaznom od 500 do 1.500 KM.
- (2) Ko prekršaj iz stava (1) ovog člana počini u grupi ili ga počini uz upotrebu maske ili drugog podobnog predmeta radi prikrivanja identiteta, kazniće se novčanom kaznom od 700 do 2.100 KM.
- (3) Prekršaj iz stava (1) ovog člana može se počiniti i putem sredstava javnog informisanja, društvenih mreža ili drugih sličnih sredstava elektronske komunikacije.

Član 12.
(Skitnja)

Ko se na javnom mjestu odaje skitnji, kazniće se novčanom kaznom od 300 do 900 KM.

Član 13.
(Prostitucija)

- (1) Ko se odaje prostituciji ili ko koristi usluge prostitucije, kazniće se novčanom kaznom od 500 do 1.500 KM.
- (2) Ko organizuje prostituciju ili drugog navodi na prostituciju ili ko proda, iznajmi, odnosno ustupi stan ili druge prostorije ili vozilo za vršenje prostitucije, kazniće se novčanom kaznom od 600 do 1.800 KM.
- (3) Za prekršaj iz stava (2) ovog člana kazniće se pravno lice ili preduzeće novčanom kaznom od 5.000 do 15.000 KM.
- (4) Za prekršaj iz stava (2) ovog člana kazniće se odgovorno lice u pravnom licu ili preduzeću novčanom kaznom od 700 do 2.100 KM.

Član 14.
(Prosjačenje)

- (1) Ko prosjači kazniće se novčanom kaznom od 400 do 1.200 KM.
- (2) Ko organizuje prosjačenje ili ko drugog navodi na prosjačenje, kazniće se novčanom kaznom od 600 do 1.800 KM.
- (3) Ko organizuje prosjačenje ili ko navodi na prosjačenje maloljetno lice ili duševno bolesno lice ili lice zaostalog duševnog razvoja, kazniće se novčanom kaznom od 700 do 2.100 KM.
- (4) Ko licu iz stava (1) ovog člana na javnom mjestu daje milostinju u novcu, kazniće se novčanom kaznom 400 do 1.200 KM.

- Član 15.**
(Prodaja na raskrsnicama, saobraćajnicama ili drugim javnim mjestima)
- (1) Ko prodaje ili nudi stvari (maramice, košpice, olovke i sl.) na raskrsnicama, saobraćajnicama ili drugim javnim mjestima bez odobrenja nadležnog organa, kazniće se novčanom kaznom od 400 do 1.200 KM.
 - (2) Ko kupuje stvari iz stava (1) ovog člana, pa usljed toga dođe do ometanja normalnog odvijanja saobraćaja ili kretanja građana, kazniće se novčanom kaznom od 400 do 1.200 KM.

Član 16.
(Neovlaštena prodaja, kupovina ili nudenje novca ili hartija od vrijednosti ili karti za prijevoz ili ulaznica)

Ko neovlašteno na javnom mjestu prodaje, nudi ili kupuje domaći ili strani novac ili hartije od vrijednosti ili karte za prijevoz ili ulaznice, kazniće se novčanom kaznom od 400 do 1.200 KM.

- Član 17.**
(Preprodaja ulaznica)
- (1) Ko na javnom mjestu vrši, organizuje ili omogućava preprodaju ulaznica za sportske i druge priredbe po cijenama višim od označenih, kazniće se novčanom kaznom od 400 do 1.200 KM.
 - (2) Za prekršaj iz stava (1) ovog člana kazniće se pravno lice ili preduzeće novčanom kaznom od 3.000 do 9.000 KM.

- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 500 do 1.500 KM.

Član 18.

(Igranje hazardnih igara)

- (1) Ko igra hazardnu ili drugu sličnu igru za novac ili drugu korist tako da igra gubi društveno-zabavni karakter, kazniće se novčanom kaznom od 400 do 1.200 KM.
- (2) Ko organizuje ili navodi druge da igraju ili ko proda, ustupi ili iznajmi prostorije u svrhu igranja hazardne ili druge slične igre iz stava (1) ovog člana, osim u slučajevima igranja hazardne ili druge slične igre koja se odvija u objektima ili prostorijama koje su registrovani za tu vrstu djelatnosti, kazniće se novčanom kaznom od 500 do 1.500 KM.
- (3) Ko omogućava ili navodi lice mlađe od 18 godina da igra hazardnu ili drugu sličnu igru iz stava (1) ovog člana, uključujući i objekte ili prostorije koje su registrovane za tu vrstu djelatnosti, kazniće se novčanom kaznom od 600 do 1.800 KM.
- (4) Za prekršaje iz st. (1), (2) i (3) ovog člana kazniće se pravno lice ili preduzeće ili imalac radnje, novčanom kaznom od 4.000 do 12.000 KM.
- (5) Za prekršaje iz st. (1), (2) i (3) ovog člana kazniće se odgovorno lice u pravnom licu ili preduzeću ili lice kome je povjereno vođenje radnje, novčanom kaznom od 600 do 1.800 KM.

Član 19.

(Pirotehnička sredstva)

- (1) Ko na javnom mjestu, bez odobrenja nadležnog organa, pali, posjeduje, ustupa, prodaje, kupuje ili nudi petarde ili druga pirotehnička sredstva, kazniće se novčanom kaznom od 400 do 1.200 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 3.000 do 9.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 500 do 1.500 KM.

Član 20.

(Priređivanje bakljada, vatrometa i sličnih priredbi)

- (1) Ko priredi bakljadu, vatromet ili sličnu priredbu bez propisane najave ili mimo zabrane nadležnog organa ili ko ne preduzme mjere osiguranja koje je dužan preduzeti ili koje mu je naložio ovlašteni organ, kazniće se novčanom kaznom od 600 do 1.800 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 5.000 do 15.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 700 do 2.100 KM.

Član 21.

(Stvaranje buke)

- (1) Ko, u vremenskom periodu od 22,00 do 06,00 sati, narušava javni red i mir u sredinama u kojima ljudi borave i rade stvaranjem buke putem različitih izvora buke, kazniće se novčanom kaznom od 500 do 1.500 KM.
- (2) Ne smatraju se prekršaji iz stava (1) ovog člana redovne aktivnosti vjerskih zajednica, kao i aktivnosti na uklanjanju posljedica elementarnih nepogoda i pri drugim izvanrednim događajima ili okolnostima koje mogu izazvati veće materijalne štete, ugrožavati živote i zdravlje ljudi, te narušavati okoliš u većim razmjerama.
- (3) Za prekršaj iz stava (1) ovog člana kazniće se pravno lice ili preduzeće novčanom kaznom od 4.000 do 12.000 KM.
- (4) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 600 do 1.800 KM.

Član 22.

(Tuča, fizički napad ili zlostavljanje drugog)

- (1) Ko na javnom mjestu narušava javni red i mir fizičkim napadom ili zlostavljanjem drugog, kazniće se novčanom kaznom od 600 do 1.800 KM.
- (2) Ko na javnom mjestu narušava javni red i mir učestvovanjem u tuči, kazniće se novčanom kaznom od 600 do 1.800 KM.
- (3) Ko na javnom mjestu narušava javni red i mir izazivanjem ili navođenjem drugog na fizički napad ili zlostavljanje drugog ili tuču, kazniće se novčanom kaznom od 600 do 1.800 KM.
- (4) Ko na bilo koji način organizuje fizički napad ili zlostavljanje drugog ili tuču, bez obzira na to da li je do fizičkog napada ili zlostavljanja drugog ili tuče došlo, kazniće se novčanom kaznom od 700 do 2.100 KM.
- (5) Ko prekršaje iz st. (1), (2), (3) i (4) ovog člana počini u grupi ili ga počini uz upotrebu maske ili drugog podobnog predmeta radi prikrivanja identiteta, kazniće se novčanom kaznom od 700 do 2.100 KM.

Član 23.

(Propuštanje prijavljivanja narušavanja javnog reda i mira u ugostiteljskom objektu)

- (1) Pravno lice ili preduzeće i odgovorno lice u tom pravnom licu ili preduzeću, imalac radnje ili lice kome je povjereno vođenje radnje, dužni su preduzimati mjere za održavanje javnog reda i mira u njihovim poslovnim prostorijama kada je to moguće, bez opasnosti za sebe ili druge, i slučajeve narušavanja javnog reda i mira odmah prijaviti policijskoj upravi ili policijskom službeniku.
- (2) Pravno lice ili preduzeće ili imalac radnje koji ne postupi po odredbama stava (1) ovog člana, kazniće se novčanom kaznom od 3.000 do 9.000 KM.
- (3) Odgovorno lice u pravnom licu ili preduzeću ili lice kome je povjereno vođenje radnje koji ne postupe po odredbama stava (1) ovog člana, kazniće se novčanom kaznom od 500 do 1.500 KM.

Član 24.

(Vrijedanje vjerskih, nacionalnih, rasnih i rodnih osjećanja građana)

- (1) Ko na javnom mjestu vrijeđa vjersko, nacionalno, rasno i rodno osjećanje građana, kazniće se novčanom kaznom od 600 do 1.800 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 5.000 do 15.000 KM.
- (3) Za prekršaje iz stava (1) ovog člana kazniće se odgovorno lice u pravnom licu ili preduzeću novčanom kaznom od 700 do 2.100 KM.
- (4) Prekršaj iz stava (1) ovog člana, može se počiniti i putem sredstava javnog informisanja, društvenih mreža ili drugih sličnih sredstava elektronske komunikacije.
- (5) Ko prekršaj iz stava (1) ovog člana počini u grupi ili ga počini uz upotrebu maske ili drugog podobnog predmeta radi prikrivanja identiteta, kazniće se novčanom kaznom od 700 do 2.100 KM.

POGLAVLJE II – PREKRŠAJI PROTIV FUNKCIONISANJA DRŽAVNIH ORGANA I JAVNIH SLUŽBI

Član 25.

(Isticanje zastave ili grba)

- (1) Ko pod vidom zastave ili grba Bosne i Hercegovine ili Federacije Bosne i Hercegovine ili Kantona Sarajevo na javnom mjestu ističe zastavu ili grb koji ne sadrže obilježja propisana ustavom i zakonom Bosne i Hercegovine ili Federacije Bosne i Hercegovine ili Kantona Sarajevo, kazniće se novčanom kaznom od 100 do 400 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 1.500 do 7.500 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 300 do 750 KM.
- (4) Za prekršaj iz stava (1) ovog člana kazniće se i odgovorno lice u organu uprave i drugom organu, odnosno organu Grada Sarajeva i općine sa teritorije Kantona Sarajevo, novčanom kaznom od 300 do 750 KM.

Član 26.

(Uništenje ili oštećenje novca Bosne i Hercegovine)

Ko na javnom mjestu pocijepa ili na drugi način uništi ili ošteti novac Bosne i Hercegovine, kazniće se novčanom kaznom od 400 do 1.200 KM.

Član 27.

(Neovlašteno uništenje, cijepanje ili isticanje javno istaknutih objava, oglasa ili predmeta)

- (1) Ko neovlašteno uništi, pocijepa ili na drugi način ošteti javno istaknute objave, oglase ili predmete koje su, u skladu sa propisima, postavili državni organi, pravna lica, preduzeća ili fizička lica ili ko spriječi njihovo isticanje ili ih ističe suprotno propisima, kazniće se novčanom kaznom od 400 do 1.200 KM.
- (2) Za prekršaj iz stava (1) ovog člana kazniće se pravno lice ili preduzeće ili imalac radnje novčanom kaznom od 3.000 do 9.000 KM.

- (3) Za prekršaj iz stave (1) ovog člana kazniće se odgovorno lice u pravnom licu ili preduzeću ili lice kome je povjereno vođenje radnje novčanom kaznom od 500 do 1.500 KM.

Član 28.

(Nepostupanje po naredbama, rješenjima i drugim obavezujućim aktima nadležnih organa)

- (1) Ko ne postupi po naredbi ili rješenju nadležnog organa kojim se ograničava ili zabranjuje pristup, kretanje ili zadržavanje lica na određenom mjestu ili ko se ne udalji iz grupe koju je policijski službenik pozvao da se razide, kazniće se novčanom kaznom od 600 do 1.800 KM.
- (2) Ko ne postupi po naredbi nadležnog organa kojim se propisuju mjere za zaštitu stanovništva od zaraznih bolesti, kazniće se novčanom kaznom od 600 do 1.800 KM.
- (3) Za prekršaje iz st. (1) i (2) ovog člana kazniće se pravno lice ili preduzeće ili imalac radnje novčanom kaznom od 5.000 do 15.000 KM.
- (4) Za prekršaje iz st. (1) i (2) ovog člana kazniće se odgovorno lice u pravnom licu ili preduzeću ili lice kojem je povjereno vođenje radnje novčanom kaznom od 700 do 2.100 KM.

Član 29.

(Sprječavanje, ometanje ili omalovažavanje državnih organa, preduzeća i drugih pravnih lica ili njihovih službenih, odnosno odgovornih lica)

- (1) Ko sprječava, ometa ili omalovažava državne organe, preduzeća odnosno druga pravna lica koje vrše javna ovlaštenja ili njihova službena lica, odnosno odgovorna lica prilikom vršenja ili u vezi sa vršenjem službenih poslova i zadataka ili ko ne postupi na licu mjesta po određenom zakonitom zahtjevu ili naređenju službenog lica, kazniće se novčanom kaznom od 600 do 1.800 KM.
- (2) Ko prekršaj iz stava (1) ovog člana počini u grupi ili ga počini uz upotrebu maske ili drugog podobnog predmeta radi prikrivanja identiteta, kazniće se novčanom kaznom od 700 do 2.100 KM.
- (3) Za prekršaj iz stava (1) ovog člana kazniće se pravno lice ili preduzeće ili imalac radnje novčanom kaznom od 5.000 do 15.000 KM.
- (4) Za prekršaj iz stava (1) ovog člana kazniće se odgovorno lice u pravnom licu ili preduzeću ili lice kojem je povjereno vođenje radnje novčanom kaznom od 700 do 2.100 KM.

Član 30.

(Iznošenje ili prenošenje lažnih vijesti i tvrđenja)

- (1) Ko iznosi ili prenosi lažne vijesti ili tvrđenja kojima se izaziva panika ili teže narušava javni red i mir ili onemogućava ili značajnije ometa sprovođenje odluka i mjera nadležnih organa i institucija koji vrše javna ovlaštenja, kazniće se novčanom kaznom u iznosu od 600 do 1.800 KM.
- (2) Ko prekršaj iz stava (1) ovog člana počini za vrijeme trajanja stanja prirodne i druge nesreće, kazniće se novčanom kaznom od 700 do 2.100 KM.

- (3) Za prekršaje iz st. (1) i (2) ovog člana kazniće se pravno lice ili preduzeće novčanom kaznom od 5.000 do 15.000 KM.
- (4) Za prekršaje iz st. (1) i (2) ovog člana kazniće se odgovorno lice u pravnom licu ili preduzeću novčanom kaznom od 7.00 do 2.100 KM.
- (5) Prekršaji iz st. (1) i (2) ovog člana, mogu se počiniti i putem sredstava javnog informisanja, društvenih mreža ili drugih sličnih sredstava elektronske komunikacije.

Član 31.

(Lažno predstavljanje)

Ko se lažno predstavlja kao službeno lice državnog organa, predstavnik međunarodne ili druge organizacije, odgovorno lice preduzeća ili drugog pravnog lica, ili ko neovlašteno nosi njihove službene oznake ili uniforme ili službene legitimacije ili isprave, ili ko upotrijebi lažne lične podatke kao svoje ili ko potvrdi tuđe lažne lične podatke kao tačne, kazniće se novčanom kaznom od 600 do 1.800 KM.

Član 32.

(Lažno prijavljivanje)

- (1) Ko prijavi određenu osobu da je počinila prekršaj protiv javnog reda i mira propisan ovim zakonom, znajući da ta osoba nije počinilac prekršaja, ili ko pozivom ovlaštenom organu uzrokuje nepotreban izlazak na mjesto događaja policijskih službenika, kazniće se novčanom kaznom od 500 do 1.500 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 4.000 do 12.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 600 do 1.800 KM.

POGLAVLJE III – PREKRŠAJI PROTIV INTERESA MALOLJETNIKA I DRUGIH KATEGORIJA LICA

Član 33.

(Klađenje maloljetnih lica)

- (1) Ko omogućava ili navodi lice mlađe od 18 godina da se kladi u objektima koji su registrovani za tu vrstu djelatnosti, kazniće se novčanom kaznom od 600 do 1.800 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 5.000 do 15.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 700 do 2.100 KM.

Član 34.

(Davanje alkoholnih pića ili nargile određenim kategorijama lica)

- (1) Ko prodaje, daje ili na bilo koji drugi način omogući konzumiranje alkoholnih pića pijanom licu, maloljetniku, duševno oboljelom licu ili licu zaostaloga duševnog razvoja, kazniće se novčanom kaznom od 500 do 1.500 KM.

- (2) Ko prodaje, daje ili na bilo koji drugi način omogući konzumiranje nargile maloljetniku, duševno oboljelom licu ili licu zaostalog duševnog razvoja, kazniće se novčanom kaznom iz od 500 do 1.500 KM.
- (3) Za prekršaje iz st. (1) i (2) ovog člana kazniće se pravno lice ili preduzeće ili imalac radnje, novčanom kaznom od 4.000 do 12.000 KM.
- (4) Za prekršaje iz st. (1) i (2) ovog člana kazniće se odgovorno lice u pravnom licu ili preduzeću ili lice kome je povjereno vođenje radnje, novčanom kaznom od 600 do 1.800 KM.

Član 35.

(Odgovornost za drugog)

- (1) Roditelj, usvojilac, odnosno staralac starijeg maloljetnika koji je učinio prekršaj protiv javnog reda i mira propisan ovim zakonom, ako je izvršenje prekršaja posljedica njegovog propuštanja dužnog staranja o starijem maloljetniku, a u mogućnosti je da takav nadzor vrši, kazniće se novčanom kaznom od 500 do 1.500 KM.
- (2) Roditelj, usvojilac, odnosno staralac mlađeg maloljetnika koji je u vremenskom periodu od 23,00 do 06,00 sati učinio prekršaj protiv javnog reda i mira propisan ovim zakonom, ako je izvršenje prekršaja posljedica njegovog propuštanja dužnog staranja o mlađem maloljetniku, a u mogućnosti je da takav nadzor vrši, kazniće se novčanom kaznom od 600 do 1.800 KM.
- (3) Roditelj, usvojilac, odnosno staralac starijeg maloljetnika koji je od strane policijskog službenika zatečen na javnom mjestu u vremenskom periodu od 23,00 do 06,00 sati, bez nadzora roditelja, usvojioca, odnosno staraoca, kazniće se novčanom kaznom od 300 do 900 KM.
- (4) Roditelj, usvojilac, odnosno staralac mlađeg maloljetnika, koji je od strane policijskog službenika zatečen na javnom mjestu u vremenskom periodu od 23,00 do 06,00 sati, bez nadzora roditelja, usvojioca, odnosno staraoca, kazniće se novčanom kaznom od 400 do 1.200 KM.
- (5) Kada je maloljetnik koji nije navršio 14 godina počinio prekršaj protiv javnog reda i mira propisan ovim zakonom zbog propuštanja dužnog nadzora roditelja, usvojioca, odnosno staraoca, a ovo lice je bila u mogućnosti su da takav nadzor vrši, roditelj, usvojilac, odnosno staralac maloljetnika bit će kažnjeni za prekršaj kao da ga je sam učinio.

POGLAVLJE IV – OSTALI PREKRŠAJI PROTIV JAVNOG REDA I MIRA

Član 36.

(Neovlašteno ili neopravdano zalaženje i zadržavanje u prostorima, prostorijama i objektima)

Ko neovlašteno ili neopravdano zalazi ili se zadržava u zajedničkim prostorima, prostorijama i objektima (stubište, tavan, podrum, šupa, ograđeno dvorište i sl.) stambene zgrade u kojoj ne stanuje, kao i zajedničkim prostorima, prostorijama i objektima obrazovne ili druge javne ustanove, kazniće se novčanom kaznom od 400 do 1.200 KM.

Član 37.

(Neovlašteno fotografisanje ili skiciranje objekata i mjesta)

- (1) Ko neovlašteno vrši fotografisanje ili skiciranje objekata i mjesta koja su označena kao zabranjena za fotografisanje i skiciranje, kazniće se novčanom kaznom od 500 do 1.500 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 4.000 do 12.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 600 do 1.800 KM.

Član 38.

(Konzumiranje opojne droge ili psihotropnih supstanci)

Ko na javnom mjestu konzumira opojnu drogu ili psihotropne supstance, kazniće se novčanom kaznom od 700 do 2.100 KM.

Član 39.

(Prikupljanje dobrovoljnih priloga bez odobrenja nadležnog organa)

- (1) Ko prikuplja dobrovoljne priloge protivno odredbama člana 51. ovog zakona, kazniće se novčanom kaznom od 500 do 1.500 KM.
- (2) Za prekršaj iz stava (1) ovog člana kazniće se pravno lice ili preduzeće novčanom kaznom od 4.000 do 12.000 KM.
- (3) Za prekršaj iz stava (1) ovog člana kazniće se odgovorno lice u pravnom licu ili preduzeću novčanom kaznom od 600 do 1.800 KM.

Član 40.

(Postupanje sa životinjama)

- (1) Ko bez nadzora i zaštitnih sredstava drži i vodi opasne ili potencijalno opasne životinje koje drugog mogu prestrašiti ili povrijediti, kazniće se novčanom kaznom od 600 do 1.800 KM.
- (2) Ko na javnom mjestu zlostavlja životinje, odnosno na drugi način sa njima surovo postupa, kazniće se novčanom kaznom od 700 do 2.100 KM.

DIO TREĆI – ZAŠTITNE MJERE

Član 41.

(Zaštitne mjere i izricanje zaštitnih mjera)

- (1) Okrivljenom se za prekršaj propisan ovim zakonom mogu izreći sljedeće zaštitne mjere:
 - a) zabrana vršenja poziva, djelatnosti ili dužnosti,
 - b) zabrana javnog istupanja,
 - c) liječenje od zavisnosti,
 - d) zabrana pristupa oštećenom, objektima ili mjestu izvršenja prekršaja i
 - e) oduzimanje predmeta.

- (2) Sud može rješenjem o prekršaju okrivljenom izreći jednu ili više zaštitnih mjera iz stava (1) ovog člana, u skladu sa odredbama Zakona o prekršajima ("Službene novine Federacije BiH", broj 63/14).
- (3) Ovlašteni organ može prekršajnim nalogom okrivljenom izreći samo zaštitnu mjeru oduzimanja predmeta, u skladu sa odredbama zakona iz stava (2) ovog člana.

Član 42.

(Izricanje zaštitne mjere zabrana vršenja poziva, djelatnosti ili dužnosti)

Sud može rješenjem o prekršaju izreći zaštitnu mjeru zabrane vršenja poziva, djelatnosti ili dužnosti, u periodu do šest mjeseci pravnom licu, a u periodu od tri mjeseca do jedne godine odgovornom licu u pravnom licu i fizičkom licu okrivljenom za prekršaje iz čl. 13., 17., 18., 19., 20., 21., 23., 28., 29., 30., 33., 34., 37., 39. i 40. ovog zakona.

Član 43.

(Izricanje zaštitne mjere zabrane javnog istupanja)

Sud može rješenjem o prekršaju izreći zaštitnu mjeru zabrane javnog istupanja, u periodu do šest mjeseci pravnom licu, a u periodu od tri mjeseca do jedne godine odgovornom licu u pravnom licu i fizičkom licu okrivljenom za prekršaje iz čl. 24. i 30. ovog zakona.

Član 44.

(Izricanje zaštitne mjere liječenja od zavisnosti)

Sud može rješenjem o prekršaju izreći zaštitnu mjeru liječenja od zavisnosti, uz uvjet da trajanje takvog liječenja nije duže od jedne godine, fizičkom licu okrivljenom za prekršaj iz člana 38. ovog zakona

Član 45.

(Izricanje zaštitne mjere zabrane pristupa oštećenom, objektima ili mjestu izvršenja prekršaja)

Sud može, na pisani prijedlog podnosioca zahtjeva za pokretanje prekršajnog postupka ili na usmeni zahtjev oštećenog istaknut na saslušanju u prekršajnom postupku, rješenjem o prekršaju izreći zaštitnu mjeru zabrane pristupa oštećenom, objektima ili mjestu izvršenja prekršaja, fizičkom licu kažnjenom za prekršaje iz čl. 10., 11., 14., 15., 16., 17., 18., 19., 20., 22., 24., 28., 31., 32., 33., 34., 36., 37. i 39. ovog zakona.

Član 46.

(Izricanje zaštitne mjere oduzimanje predmeta)

Sud može rješenjem o prekršaju, a policijski službenik Uprave policije može prekršajnim nalogom, izreći zaštitnu mjeru oduzimanja predmeta, okrivljenom za prekršaje iz čl. 10., 11., 12., 13., 14., 15., 16., 17., 18., 19., 20., 21., 22., 24., 25., 26., 27., 28., 29., 30., 31., 32., 33., 34., 37., 38., 39. i 40. ovog zakona.

Član 47.

(Privremeno oduzimanje predmeta)

Kada u vršenju službenih poslova i zadataka saznaju za prekršaj propisan ovim zakonom, policijski službenici mogu privremeno oduzeti predmete koji su upotrijebljeni ili su bili

namijenjeni za izvršenje prekršaja ili koji su nastali izvršenjem prekršaja, kao i predmete koji mogu poslužiti kao dokaz u prekršajnom postupku.

Član 48.

(Postupak sa oduzetim predmetima)

Uprava policije će postupiti sa oduzetim predmetima u skladu sa odlukom nadležnog suda ili odlukom rukovodioca nadležne organizacione jedinice Uprave policije donesenom u skladu sa odredbama Uredbe o smještaju, čuvanju i postupanju sa privremeno oduzetim predmetima od strane policijskih službenika Uprave policije Ministarstva unutrašnjih poslova Kantona Sarajevo ("Službene novine Kantona Sarajevo", broj 2/20).

Član 49.

(Nepoštivanje zaštitnih mjera)

Ko prekrši zaštitnu mjeru iz čl. 42., 43., 44. i 45. ovog zakona, za vrijeme njenog trajanja, kazniće se novčanom kaznom od 700 do 2.100 KM.

DIO ČETVRTI – BAKLJADE I VATROMETI I PRIKUPLJANJE DOBROVOLJNIH PRILOGA

Član 50.

(Bakljade i vatrometi)

- (1) Bakljade, vatrometi i slične priredbe (u daljnjem tekstu: priredbe) mogu se priređivati, a pirotehnička sredstva koristiti na javnim mjestima u skladu sa odredbama ovog i drugih zakona.
- (2) Priređivanje priredbe mora se prijaviti policijskoj upravi Uprave policije na čijem području će se priredba održati najkasnije u roku od osam dana prije održavanja priredbe.
- (3) Ako se priredba namjerava održati na području koje obuhvata dvije ili više općina u Kantonu Sarajevo, prijava se, u roku iz stava (2) ovog člana, podnosi Sektoru uniformisane policije u Upravi policije (u daljnjem tekstu: Sektor uniformisane policije).
- (4) O prijavljenoj priredbi iz stava (3) ovog člana Sektor uniformisane policije obavještava policijske uprave na čijem području će se održati priredba.
- (5) U prijavi se, pored ostalog, mora navesti mjesto, vrijeme i svrha održavanja priredbe, broj baklji, odnosno količina pirotehničkih sredstava koja će se upotrijebiti, podaci o licu koje će rukovati pirotehničkim sredstvima, kao i mjere osiguranja koje će se preduzeti.
- (6) Nadležne organizacione jedinice Uprave policije iz st. (2) i (3) ovog člana, donose rješenje kojim se odobrava održavanje priredbe, najkasnije 72 sata prije najavljenog termina održavanja priredbe.
- (7) Priređivač je dužan da sprovodi mjere osiguranja koje mu u rješenju odredi policijska uprava, odnosno Sektor uniformisane policije.
- (8) Policijska uprava, odnosno Sektor uniformisane policije, može zabraniti održavanje priredbe ako to zahtijevaju razlozi javne sigurnosti. U tom slučaju, policijska uprava, odnosno Sektor uniformisane policije, donosi rješenje o zabrani održavanja priredbe

i dostavlja ga priređivaču najkasnije 72 sata prije najavljenog termina održavanja priredbe.

- (9) Žalba izjavljena protiv rješenja iz st. (6) i (7) ovog člana podnosi se ministru Ministarstva unutrašnjih poslova Kantona Sarajevo (u daljnjem tekstu: ministar), najkasnije 48 sati prije najavljenog termina održavanja priredbe i ne odlaže izvršenje rješenja.
- (10) Ministar će rješenjem odlučiti o žalbi i isto dostaviti priređivaču najkasnije 24 sata prije najavljenog termina održavanja priredbe.

Član 51.

(Prikupljanje dobrovoljnih priloga)

- (1) Dobrovoljni prilozi građana mogu se prikupljati u skladu sa odredbama ovog zakona.
- (2) Dobrovoljne priloge mogu prikupljati preduzeća i druga pravna lica, humanitarne i druge organizacije i građani i njihova udruženja ako za to imaju odobrenje načelnika općine na čijem području se prilozi prikupljaju.
- (3) U zahtjevu kojim se traži odobrenje za prikupljanje dobrovoljnih priloga, pored ostalog, mora se navesti cilj, svrha i način prikupljanja, mjere koje će se preduzeti radi osiguranja od eventualnih zloupotreba u vezi sa prikupljanjem, vrijeme za koje se traži odobrenje za prikupljanje kao i područje na kojem će se vršiti prikupljanje.
- (4) Ovlašteni podnosioci zahtjeva za prikupljanje dobrovoljnih priloga iz stava (2) ovog člana kojima je odobreno prikupljanje dobrovoljnih priloga, dužni su sprovesti mjere osiguranja od zloupotreba koje su određene odobrenjem za prikupljanje dobrovoljnih priloga.
- (5) Zahtjev za izdavanje odobrenja za prikupljanje dobrovoljnih priloga može se rješenjem odbiti ako prikupljanje dobrovoljnih priloga može izazvati uznemirenje građana ili narušiti javni red i mir ili ako nije opravdan cilj ili svrha prikupljanja dobrovoljnih priloga.
- (6) Daljnje prikupljanje dobrovoljnih priloga može se rješenjem zabraniti iz razloga utvrđenih u stavu (5) ovog člana ili ako se ustanovi da se ne sprovode mjere osiguranja od zloupotreba ili da su u zahtjevu navedeni netačni podaci o cilju ili svrsi prikupljanja.
- (7) Na rješenje iz stava (6) ovog člana može se izjaviti Drugostpenoj stručnoj komisiji nadležnog općinskog vijeća u roku od 15 dana od prijema istog, a koja će u daljnjem roku od 15 dana donijeti odluku po podnesenoj žalbi.
- (8) Žalba izjavljena protiv rješenja iz st. (5) i (6) ovog člana ne odlaže izvršenje rješenja.
- (9) Odobrenje iz stava (2) ovog člana nije potrebno za dobrovoljne priloge:
 - a) koji se prikupljaju u okviru preduzeća ili drugog pravnog lica za zajedničke potrebe ili potrebe pojedinih radnika tog preduzeća ili drugog pravnog lica,
 - b) čije prikupljanje organizuje mjesna zajednica na svom području ili kućni savjet u zgradi kojom upravlja, radi određenih ciljeva u okviru djelatnosti mjesne zajednice, odnosno kućnog savjeta,
 - c) koji se prikupljaju umjesto ulaznica za priredbe koje organizuju politička udruženja, sindikati, udruženja građana i drugi oblici udruživanja i organizovanja, a u skladu sa programom svojih aktivnosti i
 - d) koji se prikupljaju u organizaciji vjerskih zajednica.

DIO PETI – PRELAZNE I ZAVRŠNE ODREDBE

Član 52.

(Nadležnost za vršenje nadzora nad primjenom zakona)

- (1) Nadzor nad primjenom ovog zakona vrše policijski službenici Uprave policije.
- (2) Policijski službenici Uprave policije vrše kontrolu postupanja ili provođenja naredbi ili rješenja iz člana 28. stav (1) ovog zakona, odnosno naredbi iz stava (2) istog člana, i preduzimaju mjere i radnje iz svoje nadležnosti, samo ukoliko je to izričito navedeno u naredbi ili rješenju.

Član 53.

(Ovlaštenje i obaveza drugih organa za donošenje podzakonskih propisa)

- (1) Gradsko, odnosno općinsko vijeće može, u skladu sa ovim zakonom, svojom odlukom propisati i druge prekršaje protiv javnog reda i mira.
- (2) Vijeća iz stava (1) ovog člana dužna su, u roku od tri mjeseca od dana stupanja na snagu ovog zakona, uskladiti svoje odluke kojima se propisuju prekršaji protiv javnog reda i mira sa odredbama ovog zakona.

Član 54.

(Prestanak važenja zakona)

Danom stupanja na snagu ovog zakona prestaje da važi Zakon o prekršajima protiv javnog reda i mira ("Službene novine Kantona Sarajevo", br. 18/07, 7/08 i 34/20).

Član 55.

(Stupanje na snagu zakona)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj: _____
Sarajevo, __. __. ____ . godine

PREDSJEDAVAJUĆI
SKUPŠTINE KANTONA SARAJEVO
